

'Kerajaan Negeri tunggu persetujuan Kerajaan Pusat'

PETALING JAYA – Masalah kesesakan kritikal beberapa kawasan di Selangor hanya akan dapat di atasi jika cadangan Kerajaan Negeri dipersetujui Kerajaan Persekutuan.

Exco Jawatankuasa Tetap Kerajaan Tempatan Kajian dan Penyelidikan negeri, Ronnie Liu berkata, Selangor tidak akan dapat menambah baik kemudahan pengangkutan awam di negeri itu jika Kerajaan Persekutuan tidak memberikan sebarang jawapan mengenainya.

"Kerajaan Negeri hanya tunggu kata putus dari Pusat berhubung perkara ini, kami tidak ada kuasa, jika tidak perkara ini akan terus tergantung," katanya pada sidang media program PJ Livable City di Hotel Royale Bintang, di sini, semalam.

Menurutnya, kemudahan pengangkutan awam yang memerlukan penambahbaikan termasuk mengadakan lorong bas di beberapa lokasi strategik, penambahan bas dan terbaru sistem Transit Aliran Massa (MRT).



Ronnie Liu (tengah) menyaksikan Pengarah Komuniti Mampan Australia, Peter Cuming (kiri) menyerahkan cadangan mengenai Petaling Jaya daripada 180 peserta program PJ Livable City kepada Mohamad Roslan, semalam.

"MRT dibina tidak banyak membantu penduduk Selangor hanya sebahagian kawasan di Petaling Jaya dan Sungai Buloh menerima kemudahan ini sedangkan banyak lagi kawasan pesat seperti di Subang Jaya memerlukan kemudahan MRT ini," katanya

Tambahnya, di Petaling Jaya usaha peningkatan kemudahan itu kini dalam proses dan Majlis Bandaraya Petaling Jaya (MBPJ) sudah menyerahkan kertas cadangan kepada

Suruhanjaya Pengangkutan Awam Darat (Spad).

Berhubung perkara sama, Datuk Bandar Petaling Jaya, Datuk Mohamad Roslan Sakiman berkata, naik taraf fasa pertama kemudahan itu akan melibatkan kawasan Seri Setia ke Sunway.

"Kawasan ini sesak pada waktu puncak, jadi jadi jika kesesakan di kawasan ini dapat di atasi ianya adalah lebih baik dan akan diteruskan di laluan lain yang dikenal pasti," katanya.